

REVISTA SITUASAUN – MAIU 2016

ASUNTU NE'EBÉ PRESIZA TAU ATENSAUN

- ▶ **Insidente Violénsia 14 Liga ba Komemorasaun Restaurasaun Independénsia 20 Maiu no Kauza Mane Ida Mate iha Covalima;**
- ▶ **Membru Unidade Espesiál Polísia (UEP) Halo Asaltu Fíziku ba Membru F-FDTL Ida no Provoka Tensaun Entre Parte Rua;**
- ▶ **Insidente Violénsia Rejista ho Númeru Aas iha Munisipiu Vikeké no Lautein.**

INSIDENTE VIOLÉNSIA 14 LIGA BA KOMEMORASAUN RESTAURASAUN INDEPENDENSIA 20 MAIU NO KAUAZU MANE IDA MATE IHA COVALIMA

Belun ho nia Sistema Atensaun no Responde Sedu (AtReS) iha fulan Maiu rekolla insidente violénsia hamutuk 123. Husi númeru ne'e, iha insidente 14 liga ba Komemorasaun Restaurasaun Independénsia 20 Maiu. Tinan ida ne'e Povu Timor-Leste komemora 20 Maiu ba dala - XIV hodi reafirma auto determinasaun ba mundu internasionál liu husi atividade sira mak hanesan jogu komunitária, serimónia kulturál, esposisaun, konsertu múzika to'o serimónia formal isar bandeira. Maske nune'e, Sistema AtReS rekolla insidente hamutuk 14 mak akontese ligasaun no koinside (*bertepatan*) ho komemorasaun Restaurasaun Independénsia 20 Maiu. Tipu husi insidente hirak ne'e mak asalta malu, tuda no baku malu. Iha insidente grave ida mak akontese iha loraun 19 Maiu, maizumenu tuku 11.00 kalan, iha Suku Zulu Postu Administrativa Zumalai, Munisipiu Covalima, ne'ebé kauza joven ida mate. Momentu ne'ebá komidade sira partisipa hela iha serimónia 'Tebe-Tebe' hamutuk mak joven sira husi Suku Zulu no Suku Lour aproveita oportunidade hodi asalta malu no tuda malu. Iha akontesimentu ne'e fatuk kona joven ida nia reen-toos hodi rezulta kanek todan no joven ne'e mate bainhira evakua ba Sentru Saúde Ospital Zumalai.

Insidente 2 akontese tanba joven sira ne'ebé partisipa iha jogu komemorasaun 20 Maiu provoka malu no kontinua ho baku malu. Insidente 2 ne'e ida akontese iha Suku Bahu – Postu Administrativa Baukau iha loraun 12 Maiu no ida seluk akontese iha Bairro Kuluhun – Dili iha loraun 20 Maiu. Iha mós insidente 2 mak akontese iha Vikeké, ne'ebé ema deskoñesidu na'ok bandeira RDTL ne'ebé komidade dada iha uma oin. Insidente grave

Totál Insidente Violénsia iha Maiu 2016	
Munisipiu	Insidente
Aileu	5
Ainaru	10
Baukau	8
Bobonaru	2
Covalima	6
Dili	42
Ermera	6
Lautein	11
Likisá	2
Manatutu	4
Manufahi	7
Oekusi	3
Vikeké	17
Totál	123

ida seluk akontese iha Suku Maina II, Postu Administrativa Lautein, Munisipiu Lautein iha loraun 20 Maiu, maizumenu tuku 10.00 dadeer ne'ebé Polísia halo impedimentu hodi hapara Grupu Uniaun Juventude Maubere (UNIJMA) ne'ebé hakarak dada bandeira. Polísia hapara atividade ne'e tanba sira konsidera ilegal. Iha akontesimentu ne'e fetu ida hakarak hasai filmajen no Polísia husu atu labele, maibé fetu ne'e kontinua hasai filmajen, ho ida ne'e mak Polísia uza stick baku fetu ne'e no tebe nia. Momentu ne'ebá Polísia mós halo kapturasaun ba Membru Grupu UNIJMA hamutuk na'in 12 (Mane 11 no Fetu 1) lori ba Eskuadra Polísia hodi halo investigasaun no hatama iha sela preventiva.

MEMBRU UNIDADE ESPESIAL POLÍCIA (UEP) HALO ASALTU FIZIKU BA MEMBRU F-FDTL IDA NO PROVOKA TENSAUN ENTRE PARTE RUA

Iha fulan Maiu Sistema AtReS mós halo monitorizasaun ba insidente sériu ida ne'ebé envolve Membru PNTL husi Unidade Espesiál Polisia (UEP) hasoru Membru F-FDTL Ida. Insidente ne'e akontese iha loraun 13 Maiu, maizumenu tuku 11.00 kalan ne'ebé Membru UEP ho karreta ida halo asaltu fíziku ba Membru F-FDTL ida ne'ebé uza roupa sivil iha Suku Balibar, Postu Administrativa Cristo Rei, Munisipiu Dili. Insidente ne'e akontese bainhira Membru F-FDTL ne'e ho nia primu ida ho motor fila husi mate-uma no to'o iha area Balibar sira para hodi soe bee mak mosu dezentendimentu ho Membru UEP sira ne'ebé hakarak tama iha dalan ki'ik ne'ebé motor para netik, atu sira liu ho karreta atu ba partisipa festa kazamentu ida iha fatin ne'ebá. Momentu ne'ebá Membru UEP sira tun husi karreta no tuku Membru F-FDTL ne'e no aumenta tan sira nia asaun bainhira Membru F-FDTL ne'e deklar nia-an hanesan forsa ida. Insidente ne'e rezulta Membru F-FDTL kanek todan no lori keda ba Ospital Nasionál Guido Valadares (HNGV) hodi halo tratamentu.


Atitude husi Membru UEP hasoru Membru F-FDTL hamosu tensaun no reasaun forte direktamente husi media imprensa Brigadeiru Jenerál Filomeno Paixão liu husi TVTL iha loraun 16 Maiu no akuza membru balun iha PNTL ho sistemátiku hakarak duni estraga relasaun entre Instituisaun PNTL no F-FDTL. Parte PNTL liu husi Komandante Jerál Komisáriu Julio Hornay mós responde no husu ba Parte F-FDTL forma Komisaun Investigasaun conjunta ne'ebé kompostu husi Ofisiál F-FDTL no PNTL hodi halo investigasaun no agora prosesu ne'e sei kontinua hela.

INSIDENTE VIOLÉNSIA REJISTA HO NÚMERU AAS IHA MUNISIPIU VIKÉKÉ NO LAUTEIN


Sistema AtReS iha fulan Maiu mós rejista insidente violénsia ho númeru aas iha Munisipiu Vikeké hamutuk insidente 17 no iha Lautein hamutuk insidente 11. Iha Munisipiu Vikeké, insidente ne'ebé rekolla konsidera aas liu hotu komesa husi estabese Sistema AtReS iha

tinan 2009 no aas liu ho average (*rata-rata*) husi tinan kotuk ho insidente 9 kada fulan. Insidente violénsia ne'ebé akontese iha Vikeké mak hanesan kazu disputa rai, lanu no insidente seluk ne'ebé envolve ema deskoñesidu iha kazu na'ok animal, na'ok sasán, tuda uma no estraga sasán. Enkuantu iha Munisipiu Lautein, insidente ne'ebé rekolla iha fulan Maiu konsidera aas liu kompara ho average (*rata-rata*) insidente 5.2 kada fulan kontu husi Maiu tinan 2015, maske iha fulan Setembru 2015 mós rejista insidente hamutuk 11. Insidente ne'ebé akontese iha Lautein mak asalta malu entre joven ho joven no entre joven ho estudante, tuir fali insidente violénsia kauza husi hemu tua no lanu no insidente diskute malu kona-ba partidu polítiku.


KARATERÍSTIKA INSIDENTE




Insidente Fatin



Metodu Violensia



Tipu Violensia




Ema Ne'ebe Hahu Violensia Nia Jeneru saida?




Vitima Nia Jeneru Saida?




See Mak Hahu / Halo Violensia?




See Mak Responde?



Hun no Abut Konfliktu



Impaktu



ATIVIDADE PREVENSÃO NO RESPONDE BA KONFLITU

Atividade Ne'ebé Hala'ó Husi Ekpa Sistema Atensaun no Responde Sedu (AtReS)

- ▶ ONG Belun liu husi Rede Prevensaun no Responde Konfliktu (RPRK) Postu Administrativa Hatolia (Zona B) realiza atividade Sosializasaun Lejizlasaun Sai Na'in ba Rai ba Komunitade iha Suku Urahou, Postu Administrativa Hatolia (Zona B), Munisipiu Ermera. Sosializasaun ne'ebé hala'ó iha loraon 24 Maiu 2016 ho objetivu atu minimiza tensaun konfliktu iha nivel komunitade liga ba problema rai ne'ebé durante ne'e konsidera aas. Sai hanesan orador ba sosializasaun mak Representante husi Diresaun Munisipiu Terras no Propriedade Servisu Cadastrais Munisipiu Ermera, Komandante Polisia Munisipiu Ermera, Prokurador Jerál Munisipiu Ermera no Representante Belun. Komunitade ne'ebé partisipa iha eventu ne'e mai husi Postu Administrativa Hatolia kuaze ema atus tolu resin.



Atividade Ne'ebé Hala'ó Husi Ekpa Programa Apoiu Polisiamentu Komunitária (PAPK)

- ▶ Konsellu Polisiamentu Komunitária Suku Fatucahi, Postu Administrativu Fatuberlio, Munisipiu Manufahi ho apoiu husi Belun liu husi Programa Apoiu Polisiamentu Komunitária (PAPK) realiza atividade Sosializasaun Lejizlasaun Rai Nian iha loraon 23 Maiu 2016. Sosializasaun ne'e implementa atu hasa'e koñesimentu komunitade hodi redús disputa rai iha suku laran.



- ▶ Konsellu Polisiamentu Komunitária (KPK) Suku Leotela, Postu Administrativu Likisá, Munisipiu Likisá realiza atividade dame iha loraon 25 Maiu 2016 ho tema "Nahe Bite Boot Nudár Meius Kulturál ba Rezolusaun Konfliktu hodi Hametin Koezaun Sosiál". Atividade ne'e implementa husi Belun liu husi Programa Apoiu Polisiamentu Komunitária (PAPK), Ministériu Solidariedade Sosiál (MSS) no Diresaun Nasionál Prevensaun Konfliktu Komunitária (DNPCK). Atividade ne'e realiza relasiona ho asaltu malu entre grupu Arte Marsiál PSHT no KORK iha loraon 13 FEVEREIRU 2016 ne'ebé rezulta membru PSHT ida mate. Objetivu husi atividade ne'e mak atu hadi'a relasaun entre familia parte rua hodi nune'e labele hamosu tan konfliktu iha komunitade nia leet. Orador prinsipál iha atividade nahe bite boot mak hanesan Sekretáriu Estadu Terras e Propriedade, Sekretáriu Estadu Juventude no Desportu, Administrador Munisipiu, Komandante Munisipiu.



Atividade Ne'ebé Hala'ó Husi Ekpa Mediasaun no Rezolusaun ba Disputa Rai (MRDR)

- ▶ Iha loraon 17 Maiu 2016, Ekpa Belun halo sorumutu ida ho Diretór Direção Nacional Terras, Propriedade e Serviços Cadastrais (DNTPSC) Sr. Romão Guterres hodi follow up pedido akordu kooperasaun entre Belun no DNTPSC ba apoiu no fasilita mediasaun ba disputa rai. Akordu ne'e agora iha ona Asesor sira hodi estuda no analiza.

KONA-BA REVISTA NE'E

Revista situaun ne'e relata kona-ba asuntu xave relasiona ho insidente violénsia no tendénsia konfliktu husi koleasaun dados monitorizasaun liuhosi Sistema Atensaun no Responde Sedu (AtReS), kobre iha Postu Administrativu 43, husi postu 65, suku 208 iha Timor-Leste durante Maiu 2016. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dados ne'ebé ami iha, liuhosi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Espesialista Prevensaun Konfliktu & Polítika: laurensius.belun@gmail.com